

HM- JK Visit

गृहमंत्री होर कल राती जम्मू-कश्मीर दे दौरे पर जम्मू पुज्जे हे। जम्मू पुज्जने पर उपराज्यपाल मनोज सिन्हा होरें उन्दा सोआगत कीता। गृहमंत्री अमित शाह होर जम्मू च सीमा सुरक्षा दी समीक्षा करडन। ओह सुरक्षा एजेंसियों ते प्रशासनिक अधिकारियों कन्नै मलाटी करडन। गृहमंत्री अमित शाह होर हुनै थमां किश चिर पैहले कठुआ जिले दी हीरानगर थाहर पुज्जे। गृहमंत्री होर अंतराष्ट्रीय बन्ने कन्नै लग्गदी अगेत्री चौकियों दा दौरा करा'रदे न। इसदा मकसद बन्ने पारा थमां घुसपैठ रोकने आस्तै सीमा सुरक्षा बल आस्सेआ कीते जा'रदे हीलें- इस कम्मे लेई लाए गेदे उपकरणें ते साजो-समेयान दा निरीक्षण करना ऐ। मगरा गृहमंत्री शहीद सैनिकें दे परोआरें कन्नै जम्मू दे लोक भवन च मलाटी करियै नियुक्ति -पत्र सौंपगंन। मगरा ओह इक उच्ची सतह दी सुरक्षा समीक्षा बैठक दी अध्यक्षता करगंन।

<><><><><><>

JK -Budget

मुख्यमंत्री उमर अब्दुल्ला होर विधानसभा च अज्ज 2026-27 बरे आहला केन्द्र शासित प्रदेश जम्मू-कश्मीर दा बजट पेश करा रदे न। प्रश्नकाल मगरा बजट पेश कीता गया। मुख्यमंत्री उमर अब्दुल्ला हुंदी अगुआई आहली इस सरकार दा एह दुआ बजट ऐ। मुख्यमंत्री हुंदे कश खजाना मैहकमे दा बी कम्मकाज ऐ।

<><><><><><>

PM -Priksha Pe Charcha

प्रधानमंत्री नरेंद्र मोदी अज्ज बडलै 'परीक्षा पे चर्चा' दे 9में संस्करण च देशै दे विद्यार्थियों कन्नै गल्लबात कीती। इस कार्यक्रम दा मकसद परीक्षा दे तनाव पर चर्चा करना ते इम्तेहानें गी इक उत्सव ते जीवन दे इक ज़रूरी हिस्से दे तौर पर मनाना ऐ। प्रधानमंत्री हुन्दे आस्सेआ शुरू कीते गेदे 'परीक्षा पे चर्चा' कार्यक्रम दा मकसद राष्ट्रीय शिक्षा नीति 2020-मूजब आत्मविश्वास, सकारात्मकता ते संपूर्ण कल्याण गी बढ़ावा देईऐ विद्यार्थियों दे परीक्षा दे अनुभव गी नमां रूप देना ऐ। एह पैहल हर बरे विद्यार्थियों, अभिभावकें ते शिक्षकें दी बददी हिस्सेदारी दे कन्नै इक राष्ट्रव्यापी ज- आंदोलन बनी गई ऐ। शिक्षा मंत्रालय नै दस्सेआ ऐ जे माईगाँव पोर्टल राएं इस कार्यक्रम आस्तै चार करोड़ 50 लख थ्वां मते विद्यार्थियों, शिक्षकें ते अभिभावकें पंजीकरण

कराया। एह कार्यक्रम दूरदर्शन, प्रधानमंत्री हुन्दे यूट्यूब चैनल ते शिक्षा मंत्रालय दे सोशल मीडिया प्लेटफॉर्म पर लाइवटेलीकास्ट कीता गया।

<><><><><><>

CM-ECO Survey

मुख्यमंत्री उमर अब्दुल्ला हो'रें कल विधानसभा च 2025-26 लेई आर्थिक सर्वेक्षण रिपोर्ट पेश कीती। रिपोर्ट च प्रमुख क्षेत्रें च लगातार प्रगति गी उजागर कीता गया ऐ। केन्द्र शासित प्रदेश दी अर्थबवस्था 2 लख 86 ज्हार करोड़ रपे होने दा अंदाजा ऐ। 2025-26 च असल जी.एस.डी.पी. (सकल राज्य घरेलू उत्पाद) दा बाढ़ा 5 इशारिया 8/2 फीसद रौहने दा अनुमान ऐ- जिसलै के मुद्रास्फीति घटियै 3 इशारिया 8 फीसद होई गई ऐ ते हर म्हानु दी आमदन बधियै इक लख 68 ज्हार रपे होई गई ऐ। 2025 च सैलानियें दी आमद इक करोड़ 78 लख कोला मती होई गई ऐ। सेहत-सेवा- शिक्षा बुनियादी ढांचे- बिजली उत्पादन ते डिजिटल प्रशासन च महत्वपूर्ण फायदें दर्ज कीते गे न- जेहड़े समूलचे जम्मू-कश्मीर च लगातार आर्थिक ते समाजी विकास गी दर्शादि न।

<><><><><><>

Motion of Thanks

जम्मू-कश्मीर विधानसभा नै जंदी 2 फरवरी गी सदन च उपराज्यपाल हुं'दे अभिभाषण पर धन्नवाद प्रस्ताऽ गी कल पास करी दिता। विधायक शौकत हुसैन गनी हो'रें एह प्रस्ताऽ सदन च पेश कीता ते डाक्टर रामेश्वर सिंह हो'रें एहदा समर्थन कीता। धन्नवाद प्रस्ताऽ पर होई दी चर्चा दा परता दिंदे होई मुख्यमंत्री उमर अब्दुल्ला हो'रें बरोधी धड़े आसेया कीती जा'रदी निंदेया दा जवाब दिता ते अपनी सरकार दियें प्राथमिकताएं पर लौऽ पाई। उ'नें जम्मू-कश्मीर दा राज्य दा दर्जा ते बशेश दर्जा ब्हाल करने सने 200 युनिट मुफ्त बिजली देने दी अपनी सरकार दी वचनबद्धता गी फही पक्का कीता। उमर हो'रें जम्मू ते कश्मीर बशकार विकास संतुलन बरकरार रक्खने सनें प्रदेश ते युनिवर्सिटियें- कृषि युनिवर्सिटियें ते केन्द्री संस्थानें दी स्थापना दा हवाला बी दिता। मुख्यमंत्री हो'रें बंडु पोआने आली सियासत दी निंदेया करदे होई दरबार मूव आली परम्परा गी ब्हाल करने दा हवाना दिता ते प्रदेश कन्नै होई दी बेन्यायी गी ठीक करने दी जरूरत पर जोर पाया। उ'नें जम्मू-कश्मीर पुलस ते मकामी बसनीकें दे बलिदानें पर लौऽ पाई ते लोकतंत्र दी राक्खी ते एकता बरकरार रक्खने दा आह्वान कीता। प्रस्ताऽ गी ध्वनि मत कन्नै पास कीता गया।

<><><><><><>

JKBOSE Revaluation

जम्मू-कश्मीर स्कूली शिक्षा बोर्ड नै 10मीं ते 12मीं जमात दे सलाना नियमित-2025 जम्मू खिते दे स्यालै आहले ज़ोन अक्तूबर –नवम्बर सत्र) लेई परतियै Re-evaluation लेई फार्म जमा करने ते उत्तर पुस्तिकाएं दी फोटोकॉपियां हासल करने दी समें-सीमा बदाई दिती ऐ। मेदवार हुन उत्तर पुस्तिकाएं दी फोटोकॉपी आस्तै 10 फरवरी तगर ते परतियै Re-evaluation लेई 14 फरवरी 2026 तगर आवेदन करी सकदे न। विद्यार्थियें गी सलाह दिती जंदी ऐ जे ओह बधदी समें-सीमा दा सख्ती कन्नै पालन करन-कीजे अगगे होर कोई बी विस्तार नेंई दिता जाग।

<><><><><><>

Weather

मौसम विभाग नै जम्मू-कश्मीर च अगले किश दिनें तोड़ी मौसम आमतौर पर खुशक रौहने दी पेशगोई कीती ऐ पर उच्चियें धारें पर मौसम च किश बदलाव होई सकदा ऐ। आकाशवाणी संवाददाता नै मौसम विभाग दे हवालै नै जानकारी दिती ऐ जे अज्जै थ्वा गास आमतौर पर साफ रौहने दी मेद ऐ। 7 ते 8 फरवरी गी मौसम आमतौर पर खुशक रौहने दी मेद ऐ पर 9 ते 10 फरवरी गी किश उच्चियें थाहरें पर हलकी बर्फबारी ते बरखा होई सकदी ऐ। 11 ते 12 फरवरी थमां मौसम फही आमतौर पर खुशक गै रौहग।

<><><><><><>

U-19 Cricket Final

19 बरे सोयां घट्ट उमरी दे क्रिकेट खडारिएं दी इक-रोजा टूर्नामेंट दे फाइनल च, ज़िम्बाब्वे च, अज्ज भारत दा मुक्काबला इंग्लैंड कन्नै होग। एह मैच भारतीय समे मूजब दपैहरी इक बजे सोयां खेडेडआ जाग। भारत नै सेमीफाइनल च अफगानिस्तान गी मात दिती ही। इंग्लैंड दी टीम मौजूदा चैम्पियन ऑस्ट्रेलिया गी हराईऐ फाइनल च पुज्जी गई ऐ। भारतीय टीम इस टूर्नामेंट च अजें तगर कोई बी मैच नैई हारी ऐ। भारत एह टूर्नामेंट 5 बारी जीती चुके दा ऐ।

<><><><><><>